



Stine Egede
Inuit Ataqaatigiit sinnerlugit Inatsisartunut ilaasortaq

§ 37 naapertorlugu apeqquaqammumut 288/2018-imut akissuteqaat

Apeqqutigisannut tulluuttumi akissuteqarfigineqartunut qujanaq.

1. Kommune kujallermi qassinik juumooqarpa ?
 - a. Qaqortoq
 - b. Narsaq
 - c. Nanortalik

Akissut:

Peqqinnissaqarfik kujataani juumuut marluk aalajangersimasumik atorfeqarput, taakku Qaqortumi aalajangersimasumik sulisuupput kujataanili naartusut meeraaqqallu tamaasa isumagisarlugit. Arnat peqqinnissaqarfimmumut saaffiginnikkaangata naartullutillu paasitinneqarlutik juumuut naartulersimasut pillugit najukkami peqqinnissaqarfimmit ilisimatinneqartarnerat aalajangersimasumik periusiuvoq.

2. Ukiumut meeqqat qassit inuusarpat – ukiuni 2015 - 2017 ?
 - a. Qaqortumi
 - b. Narsami
 - c. Nanortalimmi

Akissut:

Peqqinnissaqarfik kujataani Qaqortumi napparsimmavik kisiartaalluni ernisarfitut akuerisaavoq. Naartunerminni ajornartorsiuteqartut naatsorsuutigisatullu erninerminni immikkut iliuuseqarfigineqartariaqartut Dronning Ingridip Napparsimmavissuanut innersuunneqartarput, tassani erninermi immikkut ilisimasalinnik sulisoqarpoq, meeqqanut nakorsaqarpoq, laboratoriami immikkut atortoqarpoq il.il..

	2015	2016	2017
Qaqortoq	57	48	55
Nanortalik	1	-	1
Narsaq	-	2	1
Alluitsup Paa	-	-	1
Nuuk	65	28	55
Erninerit amerlassusaat	123	78	113

Tabelimi takutinneqarput 2015-imit 2017-imut angajoqqaat Peqqinnissaqarfik Kujataa qitiusoqarfiani najugallit ernisimasut amerlassusaat. Piffissami pineqartumi Qaqortumi napparsimmavik aamma Dronning Ingridip Napparsimmavissua erniffiunerusimapput.

Nanortalimmi, Narsami aamma Alluitsup Paani erninerit ataasiakkaat naatsorsuutiginnngisamik tassanngaannartumillu pisarsimapput, tassa naartusut pilersaarutaasutut erninnginnerminni erniffissatut akuerisaasumut anngussinnaasimangillat.

3. Kommune Kujallermi nunaqarfinni aqqanilinni, savaateqarfinnilu arnat naartusut juumuut malinnaaffigineqarpat?

Akissut:

Peqqinnissaqarfik kujataani juumuut kujataani naartusutut ilisimatitsissutigineqarsimasut malinnaaffiguarpaat. Pisariaqartitsineq peqqissutsitsigullu naliliinerit apeqqutaatillugit naartusut timimikkut misissorneqartarput aamma telemedicin aqutigalugu nakorsiartinneqartarput.

4. Erninerluttoqarneratigut meeqqanik annaasaqartoqartarpa?

Akissut:

2015-2017-imi erninerluttoqarnerata malitsigisaanik Peqqinnissaqarfik Kujataani meeqqanik annaasaqartoqarsimangilaq.

5. Qassit Nuummut erniartortarpat?

Akissut:

Apeqqut 2-mut akissut takuuk.

6. Naartuut Qaqortumi, Narsami Nanortalimilu juumuut tamarmik malinnaaffigineqarpat?

Akissut:

Apeqqutinut 1-imut aamma 3-mut akissuteqaatit takukkit.

7. Allanik qulaani sammisamut ilisimatitsissutissaateqarpisi?

Akissut:

Peqqinnissaqarfiup Kalaallit Nunaanni ernisarnerit pillugit malittarisassat 2003-mi atuutsilerpai, tamatuma kinguneranik erninermut atatillugu meeqqat toqusoqartut ikilerujussuarsimapput. Malittarisassat nunani avannarlerni periuserineqartartut tunngavigalugit suliarineqarsimapput peqqinnissaqarfimmilu aqutsiviup ataatsip ernisarfittut atorineqarnissaanut piginnaasaqarnissamut piumasaqaatinik imaqarlutik. Pingaaruteqarpoq erseqqissaassutigissallugu peqqinnissaqarfimmi aqutsiviup ataatsip ernisarfittut atorineqarnissaanut piumasaqaatit juumuutut piginnaasaqarnissamut taamaallaat attuumassuteqannginnerat. Tassa isumannaallisaanermi tunngavigineqarpoq juumuup erninermi ikiuussinnaasup saniatigut pilattaasinnaasumik

tamatigut nakorsamik peqataasoqartarnissaa, sinitsitsisinnaasumik
peqqissaasoqarnissaa kiisalu aaviisussamik il.il. aaviisartoqarnissaa (bioanalytiker).

Pineqartut saniatigut erninerlunnermi pinartunik assigiinngitsunik sulisut
isumaginnittuusussapput, soorlu aanaartoqangaatsiarneranik, pilattaalluni
ernisitsisariaqarnermik aamma meeqqap inunngorlaap ajornartorsiorneranik
isumaginnissinnaasuussapput. Erninerlunnerit ajornerpaatillugu anaanaasup meeqqallu
inuunerannik annasaqarfiusinnaasut.

Inussiarnersumik inuulluaqqusillunga
Med venlig hilsen


Martha Abelsen